

Dithero tsa Tirelano mo Kutlwanong

Thero ka Sontaga wa 13 morago ga moletlo wa Borarobongwe, e le ka 18. 09. 2011 47/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 299 - 274/280

2. **Thapelo:** Modimo Morena yo o rategang wa rona Jesu Keresete, re lebogela Lefoko la thero ya kajeno, gonne ka lona o re bontsha se se batlegang thata, e bong go reetsa, le go dira thato ya gago. Ke gona re go kopang gore ka Lefoko la kajeno re se timele ka go gopola gore o emelanye le tshwaragano le tlhokomelano ya ditsala le ba losika, mme re lemoge gore ditsala le ba losika ba tlhongwe mo bongwengfela le mo kutlwanong, fa go tiisiwa mo gare ga bone kutlo ya go go utlwa, le go amogela thato ya gago. Re leba le ba losika lwa rona ba ba gopolang gore le ntle le wena ba ka kopana sentle gore nako e sa le teng gore ba bone gore ke wena Morena yo o dirang kutlwano le bongwefela jo e leng jona, ke wena yo o letlanyang ka boammaaruri. Amen.

3. Epistolo ka fa thulaganyong ya 2 e kwadilwe mo go 1 Johane 4:7-12;
Efangele ka fa thulaganyong ya 1 e kwadilwe mo go Luka 10:25-37.

4. A go ipolelwe tumelo ya bokeresete!
6. Thapelo ya mmadi wa thero.

Mareko 3:31-35, e re: "Jaanong ga tla mmaagwe le bomonnawe; ya re ba eme kwa ntle, ba roma kwa go ene go mmita. Mme batho ba bantsi ba bo ba dutse ba mo dikanyeditse. Ke fa ba mo raya ba re: 'Bona, mmaago le bomonnao le bokgaitsadio ba kwa ntle, ba a go batla.' A ba fetola a re: 'Mmê ke mang, le bonnake ke bomang?' A ba a leba ba ntseng fa fatshe, ba mo dikanyeditse a re: 'Bonang, mmê le bonnake ke ba! Gonne mongwe le mongwe yo o dirang thato ya Modimo, ke ene nnake le kgaisadiake le mmê.'" Amen.

8. **Thero:** Barategi mo Moreneng wa rona Jesu Keresete, motho o ka buisa polelo eo, a tloge a gakgamale, a botse, a re: Mme ke go reng, fa go tse: Tlotla rraago le mmaago? Re utlwa fano gore Jesu o ne a dikanyeditse ke batho ba le bantsi. Ke fa a utlwa molaetsa gore mmaagwe le bomonnawe le bokgaitsadiagwe ba kwa ntle, ba a mmatlata, ba rata go mmona. Go ka diragala gore go ne go le sengwe se se diragetseng, se se tlhokegileng gore Jesu a itse, a se utlwe mo go mmaagwe, le mo go bomonnawe le mo go bokgaitsadiagwe. Ka gongwe ga diragala sengwe gore ba mo kope sengwe se se tlhokegileng thata, se ba ratileng go se fetisetsa mo go ene. Gongwe ba ne ba feta fela koo, ba rata go mo dumedisa fela. Gape go ka bo go diragetse gore ba ne ba mo rata go mo kgalemela, gongwe go mo kaela ka ntlha ya sengwe. Lefoko le re: "E rile ba ga gabo ba utlwa, ba bolola go mo tshwara; gonne ba ne ba re: 'Ga a itse se a se dirang.'" Mme Jesu o ne buisanya le bontsi jwa batho ka ga kgang ya puso ya Modimo. Fa ba ga gabo ba tla, bomonnawe le mmaagwe, ba mo tsena gare. Rona batho gantsi re re madi ke mmaetsho, le rraetsho, le kgaisadia rona, le bonnake. Kajeno re rata go itse

1. botsalano le Modimo, le
2. go dira thato ya Modimo.

1. Go tsalana le Modimo ke go reng? Mo sebakeng se re tshelang mo go sona tumelo ya rona e itshwarelela mo go se re se kgonang go se dira. Fa re palelwa ke go dira se re ratang go se dira mo botshelong jwa rona o ka re: Modimo ga o tlhole o le teng. Ka moo re leba mo go sona se re se ikakanyetsang gore ke sona se se tla baakanyang tsotlhe gore re kgone. Re tshela jalo. Ke tsela e e tlwaelegileng mo matshelong a batho. Fela bontsi jwa rona bo a gopola gore ke Modimo o o re latlhang, fa re tlhagelwa ke mathata le matshwenyego. Botsalano jwa rona le ona bo a kgaoga. Le fa go ntse jalo, go molemo thata gore re itse gore mo bontleng le mo bosuleng Modimo o sa ntse wa nna mo go rona. Jesu ke tsala ya baleofi. Ke gona a buang a re: Ke tsala ya ba ba lwalang mo moweng, gonne ba ba sa lwaleng ga ba tlhoke ngaka, Mareko 2:16-17. Botsalano jwa motho le Modimo bo senyega ka metlha, fa motho a ikepa mo Modimong ka go o leofela. Motho o bontshiwa ke Mowa o o Boitshepo gore

botsalano jwa gagwe le Modimo bo rata go senyega. Ke fa motho yoo a ikwatlhaya, a be a hutsafalele maleo. Ke fa Modimo o mo tshegetsa, o mo itshwarela maleo ka ntlha ya ga Jesu, Moruanyi wa baleofi ka go ba ntshetsa thuanano. Se se gakgamatsang thata ke fa go na le batho ba ba ikayang gore botsalano jwa bone le Modimo bo tlhomame, bo botoka go feta jwa batho ba bangwe. Go molemo gore re latlhe go ikaya fa go ntseng jalo, le go bua maaka, 1 Joh. 1:8+10. Ke gona re ipolelang gore motho o amogelwa ke Modimo mo kolobetsong e e boitshepo, le fa go na le ba bangwe ba ba reng: Go sa ntse go tlhokega sengwe. Motho yo o kolobeditsweng, a nna mo boipolelong jwa kolobetso ya gagwe ke ene tsala ya ga Jesu tota. Mme motho yo o iikanyang, motho yoo o a latlhega. Thero ya ga Jesu yo o swetseng baleofi, e tlogile mo pelong ya motho yo o ntseng jalo. “Morena ga a itumelele thata ya pitse, ga a itumelele dikgoka tsa motho. Morena o itumelela ba ba mmoifang, ba ikanya bopelotlhomogi jwa gagwe, ba solofetse bopelonomi jwa gagwe,” Pes. 147:10-11.

2. Go boifa Modimo le go ikanya bopelotlhomogi jwa ona ke go dira thato ya ona. Thato ya Modimo ke gore batho botlhe ba pholosiwe, ba fitlhe mo kitsong ya boammaaruri. Mowa wa rona o rata thata go dira thato ya Modimo, mme Satane, le lefatshe, mmogo le nama ya rona di thibela mowa o o ratang legodimo mo go kalo. Ke tshwanelo gore re tlhomame rotlhe gore thato ya Modimo e tla diragala, le fa rona re leka go e tla. Thato ya Modimo e siame, le fa rona re le bosula. Thato ya Modimo e na le bopelotlhomogi, le fa rona re na le bopelompe. Thato ya Modimo e re: Lo tsena lotlhe mo pusong ya legodimo ka go dumela mo go Jesu Keresete. Tse re a di tiisa, gonne mongwe o ikanyegile mo sehubeng sa gagwe, gonne ga a se senye ka motsokwe, yo mongwe o ikanyegile mo tlhogong ya gagwe le mo sebeteng sa gagwe, gonne ga a tagwe, mme mo mading ka gongwe ga a ikanyege. O lopa mo bathong gore ba ikanyege, mme ene ga a ikanyege mo ntlheng ya ga Mamone. Legodimo le lentle, gonne mo go lona bosula ga bo nke bo tsena teng, ba ba tsenang teng ba tla nna ba tlhapisitswe ka madi a ga Jesu Keresete, Kwana ya Modimo, e se ba ba itlhapileng ka go ikaya ba ba botoka go feta ba bangwe. Modimo o re amogela ka lorato ka ntlha ya ga Keresete. Ke se se tlhokegang gore re amogelane ka lorato, re se ikatlholelane.

Mafoko a Efangele ya kajeno a a re latlha, gonne a bua ka molao wa ga Moše, a re: “Rata mongwe-ka-wena, jaaka o ithata.” Le fa go ntse jalo moperesiti, le molefi ba ne ba tla yo o utlwileng botlhoko, a le gaufi le go swa. Le nna ke tshwana le moperesiti yole le molefi yole. Ga ke a rata mongwe-ka-nna ka pelo yotlhe ya me. Le fa go ntse jalo, ga ke yo o botoka go gaisa Farao wa kwa Egepeto. Ga ke yo o botoka go gaisa goromente wa tlhophololo. Pelo ya me e sa ntse e timela ka metlha. Ke eletsa tsa ba bangwe, ke na le lefufa, ke a seba, ke ikgodisa ka tsa lefatshe la me. Thato ya Modimo e ntse e utlwala kwa lefatshe leno le felang teng. Jesu ga a latlhe ditsala tsa bone, gonne ga go a tshwaiwa gore ga a ka a ya mo go bone, mme Jesu ke monna yo o ratang gore batho ba gopole se a se ba rutang ka nako eo, le se se diragetseng ka nako eo.

Re ka re: Modimo a o re thuse ka Mowa o o Boitshepo wa ona gore re tlhatlose dipelo tsa rona, re lebe ene, re batle go etsa Jesu Keresete ka lorato lwa gagwe. Re ka re: Modimo o tlhomamisa botsalano jwa rona le ona, jaaka re re: Re a dumela gore re se nne le ditlhong, fa go senolwa le dikakanyo tsa dipelo tsotlhe tsa batho botlhe. Amen.

9. Thapelo: Morena Jesu Keresete, re lebogela mafoko a gago a kajeno a o re rutang ka ona thato ya ga Rraago, Modimo o o mo legodimong. O re thuse, o re rute ka metlha gore re itse gore tiro ya gago o e dirile bogolo ka go re swela. A re se ka ra ipapolela mo sefapaanong ka nosi, o ka re wena ga o ise o re swele. O re thuse gore dipelo tsa rona di tshgediwe, di bolokelwe mo boammaaruring jwa gago, re nne barutwa ba gago ka go nnela ruri mo Lefokong la gago. Amen.
Thapelo ya Morena: Rara wa rona yo o mo legodimong ...

10. Sefela sa 307 - 283/289

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke T. Z. Mkhize, ka ngwaga wa 1999+2005.
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.